



"SUNNAH NABI PENYUBUR KELUARGA BAHAGIA"

(13 Mac 2020/18 Rejab 1441H)

الْحَمْدُ لِلَّهِ الْقَائِلِ:

يَا أَيُّهَا الَّذِينَ ءَامَنُوا قُوا أَنْفُسَكُمْ وَأَهْلِيكُمْ نَارًا وَقُودُهَا
النَّاسُ وَالْحِجَارَةُ عَلَيْهَا مَلَائِكَةٌ غِلَاظٌ شِدَادٌ لَا يَعْصُونَ
اللَّهَ مَا أَمَرَهُمْ وَيَفْعَلُونَ مَا يُؤْمَرُونَ ﴿٦﴾

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ
وَرَسُولُهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ وَمَنْ تَبِعَهُمْ
بِإِحْسَانٍ إِلَى يَوْمِ الدِّينِ.

أَمَّا بَعْدُ ، فَيَا عِبَادَ اللَّهِ ! اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ
مُسْلِمُونَ.

Sidang Jumaat Yang Dirahmati Allah,

Saya menyeru diri saya dan sidang Jumaat sekalian, marilah sama-sama kita memperkasakan ketakwaan kita kepada Allah SWT dengan mengerjakan segala suruhan-Nya dan meninggalkan larangan-Nya. Mudah-mudahan kita mendapat keberkatan dan keredhaan-Nya di dunia mahu pun di akhirat. Mimbar pada hari ini akan membicarakan khutbah yang bertajuk: “**Sunnah Nabi Penyubur Keluarga Bahagia**”.

Sidang Jumaat Yang Dirahmati Allah,

Allah SWT berfirman dalam surah al-Ahzab, ayat 21:

أَعُوذُ بِاللَّهِ مِنَ الشَّيْطَانِ الرَّجِيمِ
لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ لِّمَن كَانَ يَرْجُوا
اللَّهَ وَالْيَوْمَ الْآخِرَ وَذَكَرَ اللَّهَ كَثِيرًا ﴿٢١﴾

Maksudnya: “Demi sesungguhnya, adalah bagi kamu pada diri Rasulullah itu contoh ikutan yang baik, iaitu bagi orang yang sentiasa mengharapkan (keredhaan) Allah dan (balasan baik) hari akhirat, serta ia pula menyebut dan mengingati Allah banyak-banyak (dalam masa susah dan senang)”.

Keluarga bahagia adalah didasari dengan kepatuhan kepada perintah Allah SWT dan mengamalkan sunnah yang dibawa oleh Rasulullah SAW. Islam menuntut umatnya untuk beramal dengan sunnah nabi SAW demi menjaga kebahagiaan dan kerukunan rumah tangga. Rasulullah SAW merupakan ikutan yang terbaik untuk diteladani oleh seluruh umat Islam. Rumah tangga yang dibina perlu dibajai dan disulami dengan akhlak dan sunnah Rasulullah SAW.

Berikut adalah beberapa sunnah Rasulullah SAW di dalam kehidupan rumah tangga baginda. Semoga ini dapat dijadikan panduan untuk menyuburkan kehidupan berkeluarga:

Sunnah Yang Pertama: Rasulullah SAW paling baik akhlak terhadap ahli keluarga baginda. Kelunakan suara, kelembutan berbicara, kemuliaan peribadi melambangkan kesempurnaan akhlak baginda SAW. Rasulullah menyantuni ahli keluarganya dalam semua hal seperti membantu melaksanakan kerja-kerja rumah sehingga baju dan kasut koyak, baginda sendiri yang menjahitnya. Bukan sekadar itu, bahkan Rasulullah melindungi keluarga baginda daripada ejekan dan fitnah. Perkara ini membuatkan ahli-ahli keluarga baginda amat menyenangkan akhlaknya. Begitulah tingginya akhlak dan budi pekerti Rasulullah SAW terhadap ahli keluarganya.

Sunnah Yang Kedua: Rasulullah SAW sentiasa makan secara berjemaah dengan isteri dan ahli keluarga baginda. Baginda menghargai makanan dan minuman yang disediakan oleh isteri. Baginda memuji-muji masakan isteri dan tidak pernah mengkritik. Baginda memberi teguran secara berhikmah kepada isterinya dan tidak pernah menyakiti hati isteri. Pernah suatu ketika makanan yang disediakan oleh isteri baginda tawar namun baginda tetap menjamahnya sehingga masakan tersebut dirasa oleh isteri. Isteri yang menyedari hal itu segera menambah garam bagi menyempurnakan rasa makanan itu.

Sunnah Yang Ketiga: Rasulullah SAW menerima kekurangan isteri, bersifat pemaaf terhadap ahli keluarga baginda. Setiap keadaan dan situasi dihadapi baginda SAW dengan tenang. Baginda tidak pernah meninggikan suara dan menengking terhadap isteri dan ahli keluarganya. Sebaliknya mentarbiah dan mendidik akhlak mereka secara berhikmah.

Sunnah Yang Keempat: Rasulullah SAW memanggil isteri dengan panggilan yang indah dan disukai. Nabi Muhammad SAW selalu memanggil **‘Aisyah Radiallahu ‘Anha** dengan panggilan kesayangan iaitu **Humaira’** (yang pipinya kemerah-merahan) sesuai dengan sifat fizikalnya. Kadangkala Rasulullah SAW juga memanggil **‘Aisyah Radhiallahu ‘Anha** dengan sebutan **“Ya ‘Aisy”** (bererti kehidupan) dengan membuang huruf

akhir untuk menunjukkan besarnya rasa cinta, kemanjaan dan kesayangan. Panggilan ini digunakan ketika Rasulullah SAW menyampaikan salam daripada malaikat Jibril untuk 'Aisyah Radhiallahu 'Anha.

Sunnah Yang Kelima: Rasulullah SAW sentiasa menghiasi wajahnya dengan senyuman. Abdullah bin Harith RA berkata: “Aku tidak pernah melihat seseorang yang lebih banyak senyuman berbanding nabi Muhammad SAW”.

Sunnah Yang Keenam: Rasulullah SAW adalah orang yang amat menjaga solat. Baginda Sentiasa bersedia untuk solat pada awal waktu. Baginda akan mengingatkan ahli keluarganya untuk menjaga solat. Baginda bukan sekadar solat sendirian malahan mengejutkan ahli keluarganya untuk mendirikan solat malam. Kesedaran menjaga solat dipupuk oleh baginda SAW kerana solat boleh mencegah daripada perbuatan mungkar dan keji.

Inilah sebahagian daripada sunnah-sunnah Rasulullah SAW dalam kehidupan rumah tangga baginda yang boleh menjadi suri teladan bagi kita semua. Namun, barang diingat terdapat banyak lagi sunnah Rasulullah SAW yang boleh kita jadikan sebagai iktibar.

Sidang Jumaat Yang Dirahmati Allah,

Mengakhiri khutbah pada hari ini, antara pesanan buat sidang Jumaat yang dirahmati Allah SWT:

Pertama: marilah sama-sama kita menghargai pasangan hidup dan keluarga serta menerima mereka seadanya disamping berusaha memperelokkan hubungan dengan mereka.

Kedua: Perteingkatkan keimanan kita kepada Allah SWT disamping mengamalkan sunnah yang dibawa oleh Rasulullah SAW demi menjaga kerukunan sebuah rumah tangga.

Ketiga: Berusaha memastikan bahwa ahli keluarga tidak melakukan perkara yang dilarang oleh agama. Ingatlah bahawa perbuatan-perbuatan maksiat boleh mengundang bala bencana dan kerosakan kepada diri, keluarga dan umat Islam.

Keempat: Memastikan ahli-ahli keluarga kita sekalian sentiasa mendirikan solat 5 waktu kerana ia merupakan jaminan kepada kebahagiaan rumah tangga. Sempurnakanlah solat, perbanyakkan munajat dan zikir kepada Allah SWT nescaya kehidupan sebuah keluarga akan menjadi sempurna.

أَعُوذُ بِاللَّهِ مِنَ الشَّيْطَانِ الرَّجِيمِ
وَأْمُرْ أَهْلَكَ بِالصَّلَاةِ وَاصْطَبِرْ عَلَيْهَا لَا نَسْأَلُكَ رِزْقًا نَحْنُ
نَرْزُقُكَ وَالْعَاقِبَةُ لِلتَّقْوَى ﴿١٣٢﴾

Maksudnya: “Dan perintahkanlah keluargamu serta umatmu mengerjakan sembahyang, dan hendaklah engkau tekun bersabar menunaikannya. Kami tidak meminta rezeki kepadamu, (bahkan) Kamilah yang memberi rezeki kepadamu dan (ingatlah) kesudahan yang baik adalah bagi orang yang bertakwa”. (surah Toha, ayat 132)

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الْآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ
الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ
الْغَفُورُ الرَّحِيمُ.



خطبة كدوا

(Bulan Mac 2020)

الْحَمْدُ لِلَّهِ نَحْمَدُهُ وَنُسْتَعِينُهُ وَنَسْتَغْفِرُهُ، وَنَعُوذُ بِاللَّهِ مِنْ
شُرُورِ أَنْفُسِنَا وَمِنْ سَيِّئَاتِ أَعْمَالِنَا، مَنْ يَهْدِهِ اللَّهُ فَلَا مُضِلَّ لَهُ، وَمَنْ
يُضِلِّهِ فَلَا هَادِيَ لَهُ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ
وَرَسُولُهُ.

اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَالتَّابِعِينَ
بِإِحْسَانٍ إِلَى يَوْمِ الدِّينِ.

أَمَّا بَعْدُ، فَيَا أَيُّهَا الْإِخْوَةُ الْمُؤْمِنُونَ! اتَّقُوا اللَّهَ، أَوْصِيكُمْ وَإِيَّايَ بِتَقْوَى
اللَّهِ فَقَدْ فَازَ الْمُتَّقُونَ.

Sidang Jumaat Yang Dirahmati Allah,

Saya berpesan kepada tuan-tuan dan diri saya sendiri supaya bertakwa kepada Allah SWT dengan mematuhi segala perintah-Nya dan menjauhi segala larangan-Nya. Sesungguhnya berbahagialah orang yang bertakwa kepada Allah.

Pada masa kini, terdapat segelintir umat Islam yang menghadapi masalah kecelaruan jantina yang salah satunya dikenali sebagai transeksual. Mereka adalah seorang lelaki atau perempuan yang berperasaan atau berpenampilan sebagai jantina yang berlawanan jenis. Sebahagian mereka sehingga tahap mengambil hormon, membuat pelbagai suntikan dan melakukan pembedahan menukar organ jantina. Hal ini bukan sekadar bertujuan ingin benar-benar menjadi jantina yang berlawanan malah ada yang turut terlibat dengan masalah sosial.

Muzakarah Jawatankuasa Fatwa Majlis Kebangsaan pada tahun 1982 telah memutuskan hukum pertukaran jantina dari lelaki kepada perempuan atau sebaliknya adalah haram. Seseorang yang dilahirkan lelaki, hukumnya tetap lelaki walaupun jantinyanya berjaya ditukarkan melalui pembedahan. Seseorang yang dilahirkan perempuan, hukumnya tetap perempuan walaupun jantinyanya berjaya ditukarkan melalui pembedahan. **Manakala seorang yang dilahirkan sebagai 'khunsa musykil'** iaitu manusia yang dilahirkan mempunyai dua alat kemaluan lelaki dan perempuan, **diharuskan melakukan pembedahan** bagi mengekalkan salah satu alat jantina yang benar-benar berfungsi dapat digunakan mengikut keadaan yang sesuai.

Ketahuiilah bahawa mengubah ciptaan Allah swt adalah dosa besar dan dilaknat oleh Allah swt. Kita sebagai bapa atau ketua keluarga, wajiblah menjaga dan memantau ahli keluarga supaya tidak beramal dengan amalan yang bertentangan dengan ajaran Islam. Ibu bapa juga hendaklah mendidik anak-anak mengikut fitrah kejadian asal mereka dan bukan sebaliknya. Contohnya, anak lelaki dipakai pakaian perempuan atau anak perempuan dibiarkan berpewatakan seperti lelaki. Firman Allah SWT dalam surah an-Nisa', ayat 119:

أَعُوذُ بِاللَّهِ مِنَ الشَّيْطَانِ الرَّجِيمِ

...وَلَا مُرَنَّهُمْ فَلْيُغَيِّرَنَّ خَلْقَ اللَّهِ وَمَنْ يَتَّخِذِ الشَّيْطَانَ وَلِيًّا
مِّن دُونِ اللَّهِ فَقَدْ خَسِرَ خُسْرَانًا مُّبِينًا ﴿١١٩﴾

Maksudnya: "...dan aku akan menyuruh mereka mengubah ciptaan Allah". Dan (ingatlah) sesiapa yang mengambil Syaitan menjadi pemimpin yang ditaati selain dari Allah, maka sesungguhnya rugilah ia dengan kerugian yang terang nyata".

Semoga kita dapat meneruskan kehidupan dengan penuh keberkatan dan sentiasa mendapat rahmat Allah swt.

Sidang Jumaat Yang Dirahmati Allah,

Pada saat yang penuh barakah ini marilah kita berselawat ke atas nabi Muhammad SAW yang membawa petunjuk dan rahmat kepada kita sekalian sepertimana perintah Allah dalam surah Al-Ahzab, ayat 56:

أَعُوذُ بِاللَّهِ مِنَ الشَّيْطَانِ الرَّجِيمِ
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا
صَلُّوا عَلَيْهِ وَسَلِّمُوا تَسْلِيمًا

“Sesungguhnya Allah dan malaikat-Nya berselawat kepada Nabi Muhammad ﷺ wahai orang yang beriman, berselawatlah kamu kepadanya serta ucapkanlah salam sejahtera dengan penghormatan yang sepenuhnya”.

اَللّٰهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَىٰ آلِ سَيِّدِنَا مُحَمَّدٍ.
كَمَا صَلَّيْتَ وَسَلَّمْتَ وَبَارَكْتَ عَلَىٰ سَيِّدِنَا اِبْرَاهِيْمَ وَعَلَىٰ آلِ سَيِّدِنَا
اِبْرَاهِيْمَ فِي الْعَالَمِيْنَ اِنَّكَ حَمِيْدٌ مَّجِيْدٌ.

اَللّٰهُمَّ اغْفِرْ لِلْمُسْلِمِيْنَ وَالْمُسْلِمَاتِ وَالْمُؤْمِنِيْنَ وَالْمُؤْمِنَاتِ الْاَحْيَاءِ مِنْهُمْ وَالْاَمْوَاتِ . اَللّٰهُمَّ اَرِنَا الْحَقَّ حَقًّا وَاَرْزُقْنَا اتِّبَاعَهُ وَاَرِنَا الْبَاطِلَ بَاطِلًا وَاَرْزُقْنَا اجْتِنَابَهُ، بِرَحْمَتِكَ يَا اَرْحَمَ الرَّاحِمِيْنَ .

اَللّٰهُمَّ اَنْزِلِ الرَّحْمَةَ وَالسَّكِيْنَةَ وَالسَّلَامَةَ وَالْعَافِيَةَ عَلٰى مَلِكِنَا، كباوه
دولي يغ مها موليا سري فادوك باكيندا يغ دثرتوان اكوغ ك-انم
بلس، السُّلْطَانُ عَبْدُ اللَّهِ رِعَايَةُ الدِّينِ الْمُصْطَفَى بِاللَّهِ شَاهِ ابْنِ الْمَرْحُومِ
سُلْطَانِ حَاجِ أَحْمَدُ شَاهِ الْمُسْتَعِينِ بِاللَّهِ، وكذلك مولانا توان يغ
تراوتاما تون داتوء سري اوتاما دكتور حاج عبد الرحمن بن حاج
عباس يغ دثرتوا نكري قولاو فينغ.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ .

عِبَادَ اللَّهِ ! إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَاءِ ذِي الْقُرْبَى وَيَنْهَى
عَنِ الْفَحْشَاءِ وَالْمُنْكَرِ وَالْبَغْيِ، يَعِظُكُمْ لَعَلَّكُمْ تَذَكَّرُونَ . فَادْكُرُوا اللَّهَ
الْعَظِيمَ يَذْكُرْكُمْ وَاشْكُرُوا عَلَى نِعَمِهِ يَزِدْكُمْ وَاسْأَلُوهُ مِنْ فَضْلِهِ يُعْطِكُمْ
وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ .